

幼稚園好多嘢玩

[1]

媽媽洗咗啲生果畀阿女。

媽：幼稚園老師都會畀生果你做茶點。

女：唔係媽媽畀咩？

[2]

爸：爸爸媽媽唔會跟你去幼稚園啊。

女：我唔要！

媽：個個小朋友嘅爸爸媽媽都去幼稚園嘅話，幼稚園入面就會有太多人㗎喇！但唔使驚㗎阿女，幼稚園老師會陪住你同其他小朋友，又會睇實你嘢有冇整親或者唔開心！佢哋同我哋一樣會錫你，需要時會幫你、鼓勵你！

女：同爸爸媽媽一樣？

[3]

媽：係呀！老師會每日安排唔同嘅活動畀你哋，例如講故仔、玩遊戲！唔止㗎，佢哋仲會教每個小朋友一樣嘅嘢，好似唱歌、跳舞、做運動、畫畫、做勞作……

女：好多嘢玩……

媽：係啊，邊玩邊學！老師會睇吓你玩得好唔好、學得好唔好，然後話返畀我哋知你鍾意做啲乜，又會同我哋講可以做啲乜去幫你學得好啲。所以其實係你學習嘅時候，爸爸媽媽都係同你一齊㗎。

[4]

爸：係啊。有時老師仲會幫你哋分組做唔同活動。

女：分組？

爸：例如老師話要三個人一組玩，噉你就要搵多兩個組員一齊玩。

女：如果我唔想三個人一齊玩呢？

[5]

爸：阿女，你要同人玩，至可以學到同人分享同多啲新玩法，因為好多遊戲要多啲人至玩到，又或者要多啲人玩至好玩。而且喺幼稚園，你要聽老師話，老師教你嘅規矩要遵守，例如去廁所要排隊、老師講嘢要保持安靜、喺走廊唔好亂跑……

女：點解幼稚園嘅規矩同我哋屋企嘅唔同嘅？

[6]

媽：因為出面嘅人同小朋友比屋企多好多，所以會有多啲唔同嘅規矩。個個都守規矩，啲小朋友至可以安全噉玩同好好學習。你諗吓，如果老師講緊一個你好鍾意嘅故仔，但其他小朋友好嘈，你會點做？

女：我會叫佢哋唔好嘈！

媽：噉你又諗吓，如果有啲小朋友係噉跑，撞低咗你，你會點做？

女：我會同老師講！

媽：都啱，整親要記得同老師講，等老師幫你。所以為咗其他人着想，我哋要守規矩。

女：哦！

爸：唔知道有咩規矩要守唔緊要，平時留心聽老師講嘢，有咩唔明就舉手問。老師話要一齊玩就一齊玩，一齊玩仲可以學到合作精神。

女：合作精神？

[7]

爸：即係大家一齊做好一件事，例如今晚爸爸幫手整飯，媽媽整魚，你呢？

女：我唔知……

媽：你可以幫手洗碗呀。幫人係一件開心嘅事，你幫多啲人，慢慢就會明白㗎喇。

女：好，我以後都幫手洗碗！

媽：好努力噉啲！

00066:《幼稚園好多嘢玩》Learning Through Play

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

“Learning Through Play” (Cantonese), written by Connie, illustrated by Wendy Wu, published by HamBaangLaang (© HamBaangLaang, 2021) under a CC BY 4.0 license on hambaanglaang.hk

[Find out more here: [HamBaangLaang Attribution terms and CC 4.0](#)]
